

A wou bleiwt do d'Ethik ?

An 61 fransésische Stied ginn dese Samschdeg Leit op d'Strooss fir géint déi ominéis bioethesch Gesetzer ze protestéieren, déi nom Vote vum 1. August 2020 déi lescht parlamentaresch Hürd sollen huelen (cf. Marchons enfants). Deemols huet d'Assemblée nationale (matt 60 Jo-Stëmme géint 37 Neen; déi aner puer Honnert waren an der Vakanz) an engems ee Gesetzesamendement gestëmmt, deen d'Ofdreiwung bis zum Moment vun der Gebuert erlaabt, net just wann d'Liewe vun der Mamm a Gefoer oder d'Kand schwéier behënnert ass, mee: „pour détresse psycho-sociale“. Also och bei materieller Aarmutt!

Natierlech sinn esou IMGes (Interruption médicale de grossesse) géint Enn vun der Schwangerschaft rar, och well se héich geféierlech fir d'Mamm sinn. Mee Fraen, déi d'Frist, déi iwwregens elo vun 12 op 14 Wochen eropgesat gëtt, iwwerschratt hunn, kënnen an Zukunft dës onpräzis, elastesch Indikatioun z.B. am 5. oder am 6. Mount geltend maachen, fir an aller Legalitéit ofzedreiw. Domat sinn déi radikal Verfechter vun engem illimitéierte „Recht op Ofdreiwung“ an alle Stadie vun der Schwangerschaft hirem „progressistischen“ Zil alt erem e Stéck méi no. Si verlaangen och, datt all Professionnels de la santé an hirer Formation initiale d'Technik vun der Ofdreiwung bäibruecht kréien. Eventuell Retizenzen solle gebrach an den Akt banaliséiert ginn. Schliesslech wëlle se den Dokter, Infirmière an Hiewanen hiert Recht op eng Objection de conscience wechhuelen, se also zwéngen, hiren hippokrateschen Opdrag ze verroden. Jo, dat si konkret Fuerderungen vun der „Journée mondiale du droit à l'avortement“, déi den 28. September zelebriert gouf (allerdénks vun der UNO net unerkannt).

Leit, déi eppes dorun aussetzen hunn, kréien nawell gäer de Stempel vum ultrareliéis Fanatiker opgedrummt, an domat de Maulkuerf ëmgehaangen. Déi meescht kucke wech.

A Frankräich (65 Milliounen Awunner) ginn an engem Joer 226 000 ongebuere Mënschen „weggemaach“. Dat ass wäit aus méi wéi duebel esou vill wéi an Däitschland, wou bei enger Bevëlkerung vun 81 Milliounen d'Ofdreiwungszuel bei ronn 100 000 läit. Dese Verglach weist, datt d'Politik ee groussen Afloss huet an datt d'Ofdreiwung beilawe keng Fatalitéit ass. An der Bundesrepublik ass d'Ofdreiwung grondsätzlech kee Recht, mee en Onrecht, an d'Frae kënnen nëmmen no enger Berodung hir Entscheidung fräi treffen.

Och d'Simone Veil huet deemols betount, datt et kee Recht op Ofdreiwung gëtt, datt d'Ofdreiwung ëmmer een Drama ass, an nëmmen an den éischten 10 Woche vun der Schwangerschaft an extremen Noutsituatiounen eng depenaliséiert Ausnam zum prinzipiell schützenswerte Recht op Liewe ka sinn. Verhütung, net d'Ofdreiwung, war an hiren An de Fraen hire Moyer, selwer ze bestëmmen, ob se e Kand kréie wëllen oder net. D'Simone Veil wollt iwwregens, datt eng IVG vun engem vun der Krankekeess getrennte Fong bezuelt gëtt, well en Embryo jo keng Krankheet ass.

Mëttlerweil ass d'Loi Veil komplett pervertéiert. D'Ofdreiwung gëtt oft als de Service après vente vun enger mësslongener Contraceptioun ugesinn. Déi, déi eng Fra iwwer postabortiv Risiken wëllen opklären an hinnen hëllef hirt Kand ze behalen, riskéiere Strofen wéinst „Entrave à l'IVG“.

André Grosbusch
Ettelbruck